

不附已者哲自濠所宴飲歸而病或謂濠中以毒云而徐志稱宸濠畏憚投以鳩毒幸不死遂以疾乞歸踰年卒墓誌則謂其病實以憂勞所致考哲去官在正德六年而卒於八年九月則憂勞成疾之說果信耶余近從其家得其從孫鼎所記遺事云宸濠欲結婚於公公潛窺其有不軌志遂力拒之是歲夏杪宸濠宴諸督撫密置孔雀毒血於瓜上進公食之少頃煩懣口不能言至欲自投於井幸羣僚立救屢免殞耳上聞其忠令馳檄還鄉而竟以毒發終悲哉然則中毒之事通國皆知之而墓誌作於宸濠未敗時故曲諱之耳誌又言公在江西有都司以贓革者福建林公俊來巡視復用之公不可俊怒移文語侵公公不以介意諭三司曰林公先朝名臣處斷必不苟蓋偶未詳耳令再具事本末以請俊大悔悟即罷弗用因重愛公比歸賦詩贈別送之數程噫公之為人豈特彊直自遂而已哉

卷之二十七

人物四

吳江縣志

卷二十七

名臣

十三

名臣二

盛應期

陸鰲

吳山

子邦渠

吳巖

顧昂

沈漢

張銓

王守

趙禴

葉可成

計江

顧曾唯

周大章

弟大韶

潘志伊

子錫祚

陳王道

盛應期字斯徵高祖寅見藝能傳應期弘治六年進士

朱鶴齡云按登科錄明刻應期爲吳江人名賢小紀

云長洲者誤也是科爲弘治癸丑云成化癸丑者又誤也

授工部都水司主事十年出司濟甯諸牘啓閉以時

令艦相銜進無得爭先戚里近倖舟挾私貨輒沒入之時太監李廣方貴幸其家人販私醴至濟甯聞應期令嚴悉投諸水去廣怒會南京進貢內臣秦文誣應期阻薦新船大不敬廣從中搆詔逮錦衣衛獄謫雲南安甯驛丞稍遷祿豐知縣祿豐古錄琫地烏焚蠻所居俗獷悍習盜教以禮法弛捕盜之禁盜皆首伏化爲良

民歷順慶府通判武昌長沙二府同知所至以公廉強直稱正德初進雲南僉事分巡金滄洱海諸道景東土知府父子信讒至相仇殺乃縛其讒人置之辟曉以大義父子如初武定土官鳳應今獻集作英死其妻攝府事與子朝鳴多行不法命應期治之應期乃單車馳入其府母子懼服悉還所奪於民策鳳氏終亂奏降其秩設官制之寢不行後卒叛進副使建議封閉諸礦以絕禍源時鎮守太監梁裕漁取無厭應期與御史張璞副使晁必登共裁抑之裕誣以他事與璞必登俱逮復下錦衣衛獄鞠訊慘烈璞竟拷死應期益不屈會乾清宮災言官論救得復職尋遷河南按察使面折太監孫清榜治其屬歷山東右布政陝西左布政鎮守太監廖鑾恃內援張甚諸弟縱橫關中應期至翦其左右翼格其一切橫斂鑾銜之先是有敕織罽費鉅萬鑾乃檄應期取直應期按籍所支已踰額數萬明日詣鑾變方盛氣以待應期出籍示之問所支如此度必有贏金今皆安在請以上聞鑾出不意內懼不能應惶恐跪謝乃已武宗將幸榆林衆懼供闕議欲加賦應期持

## 吳江縣志

### 卷二十七

名臣

十四

不可命以丁糧差次輸金抵來歲常賦之數比至供億悉辦百姓晏如扈從諸權幸氣燄薰灼撫監重臣莫敢吐氣應期獨不爲屈多所苛索不一應卒不能乘時戶部尚書李承勛在行嘆曰承勛自謂男子乃今知不逮矣明年遷右副都御史巡撫四川討平天全六番招討使高文林及流賊謝文禮文義捷聞璽書褒諭賜金幣以繼母喪歸嘉靖二年起故官巡撫江西自宸濠叛後寇盜充斥而彭蠡尤爲盜藪應期設軍巡徼立團保之法籍漁舟爲伍使互相覺察盜不能容於是平徭賦議賑救奏免雜調緡錢數十萬請留轉輸南京米四十七萬銀二十萬以食飢民民賴以甦又令諸府積穀備荒至百餘萬尋進兵部右侍郎總督兩廣軍務應期至廣偕撫甯侯朱麒督參將李璋等討平思恩土酋劉召俘斬千計召赴火死獎賚銀幣時田州土酋岑猛尤驕恣不法朝議非大征不可應期條上方略七事言廣兵疲弱不可用麒等恚會御史許中劾應期暴虐麒等因相與爲流言御史鄭洛書復劾應期賄給權貴應期已遷工部侍郎乃引疾歸歸四年黃河水溢

入漕渠沛北廟道口淤數十里糧艘爲阻侍郎章拯不能治尙書胡世甯請於昭陽湖東別開漕渠爲經久計議未定以御史吳仲言召拯還卽家拜應期右都御史往治之應期與所司相度所開地延袤百四十里圖上形勢疏言弘治以前河分爲三其二由汴之南會泗水經淮入海其一由汴以北東至兗又分爲二一出沛之飛雲一人徐之浮橋以入漕渠會淮入海正德以來乃并入北一支河全入徐沛汴得以無墊而徐獨受之近又徙而北自曹單城武等諸口奔溢趨沛橫流爲害今之計有四曰疏曰濬曰築曰改疏者決上游而殺之也濬者浚故道而順之也築者築隄而障之也改者別爲道而不與之爭也奏下世甯復謂爲便乃詔興役應期率郎中柯維熊等先治舊河俾通漕而築隄障河之衝又濬趙皮寨白河以殺其勢乃開鑿新河起昭陽湖東北進江家口南出留城口百四十里役夫六萬五千銀二十萬兩尅期六月工未成會旱災修省言者多謂開河非宜上令罷役應期請展一月竟其功不聽初柯維熊力贊新河之議至是亦言不便應期上章自理上怒詔與維熊俱奪

## 吳江縣志

### 卷二十七

名臣

十五

職世甯言新河之議倡自臣應期尅期六月今四月工已八九緣程工促急怨讟煩興維熊反覆變詐傾大臣誤國事自古家國債大事必責首議臣請與同罷上不許後更赦復官

獻集云役夫九萬八千時方冬月督責過嚴維熊等怨之陰嗾言者劾其非時興役困吏士冰雪中上怒奪其官凡七年以廟恩復職

致

仕卒年六十二後三十年朱衡卒開新河爲運道永利諸所規畫皆自應期發之應期剛果廉幹負氣屹屹不肯下人體貌嚴重家居肅如官府而遇宗族故舊咸有恩

禮人多稱之

參獻集文徵明史

潘檉章曰盛氏入國朝自寅父子而外無間焉至應期始以功名著偉矣國史稱應期有膽智遇事敢爲自爲司屬時卽以才幹聞然剛褊自遂與物多忤故雖所至有績效而殊不理於口留城新河之濬實漕道永利應期創議而撓於浮言蓋首事之難如此又言應期旣奏開新河因謬議紛起欲急於成功以杜衆口遂以嚴急興怨功未成而罷然其所開新河後三十餘年卒循其遺跡疏之運道至今蒙利云夫新河宜改已有定論獨所謂急於成功者猶未免悠悠之口耳王世

貞言新河奉詔以春和興工而公用便宜行事先期調發遂爲言者所劾夫治河者必以霜降水涸爲土功之候未有坐待春和者也而當時莫有爲之辨者然則汲黯發粟當首伏矯制之誅矣又何以稱社稷臣哉

朱鶴齡曰近刻法傳錄載應期脅岑猛重賂猛出不遜語應期怒遂疏猛反狀請討之未報而去盛公剛直如許豈應有索賂夷酋之事雜記惑人所當亟辨今按明史廣西土司田州傳但謂應期旣去詔以都御史姚鏌代而巡按謝汝儀與鏌郤乃誣鏌之子涑納猛萬金是應期在當日未嘗被納金之誣也况謂其有脅賂之實耶法傳錄之誤益明矣

陸鰲字鎮卿少從父役於京師弘治十五年進士授荊州府推官廉勤明法累決他郡疑獄陞工部都水司主事管徐州百步洪省夫役錢築石堤數千丈以便引船改監察御史督京畿東路盜賊明年按山海關劾撫臣之不職者疏籌邊三事悉見采納又按河南奪宣武等衛屯田爲勢家所據者六千餘頃給諸

## 吳江縣志

### 卷二十七

名臣

十六

貧軍歲增糧四萬石奏釋各府滯獄百數十人辨死刑之誣者六十人明年改知溫州府郡民多訟鰲曰所以致訟者由求簡訟之速爾若長民者一切不問民情將何以輸乃早夜聽斷不懈自是訟牒漸省台處甯紹歲飢流亡集境內者給粥食之裁省無名冗費民困大紓溫州濱海阻山絕商販荒政廢不講鰲令以穀贖罪三年穀盈八萬醵府城三十丈又闢通衢臨雁池以息火患陞本省參政督糧儲以出納糧爲言者誣論歸歸而葺先世遺業自號釣雪散人踰

十五年卒年六十四

參文徵

吳山字靜之洪之子也正德三年與弟巖同舉進士除刑部主事累進郎中抗直無私九年不遷官嘗錄囚江西平反疑獄以百計武宗將南巡山偕同官上章諫詔跪殿廷五日杖三十久之擢山東按察副使理驛傳軍務剷除積弊方暑月諸司多所逮繫山量輕重出之無滯囚時有湮并自渫民歌頌之遷陝西右參政嘉靖二年改浙江丁父洪艱不赴五年起爲福建按察使福建故洪治

所山聽斷公明法中行恩吏民思洪美山復歌頌之居二年遷江西布政使所至以廉靖長厚稱又二年擢副都御史巡撫河南以汴苦河患乃根極利害著治河通考十卷初河南糧兌小灘民弗便武宗時移臨清又弗便山建議移回隆運官受臨清賄爲浮言山力持之遂爲定制伊王素柔弱宦豎縱恣山疏其罪俾王自新臨漳府有將軍祐掠者招納亡命剽民財所至人皆罷市山疏論免爲庶人祐掠乃潛走京師誣山罪左降浙江參議稍遷江西參政尋擢應天府丞十五年以僉都御史巡撫四川明年晉右副都御史提督南贛軍務擢刑部右侍郎人謂當竟趨朝山曰前撫候我代經年而又稽之不可乃抵贛代畢始之部人稱爲長者轉左侍郎十九年進尙書時翊國公郭勛驕僭不法爲言者所劾下廷臣議勛故以議大禮得幸久衆未測上意皆觀望持兩端山獨奮然曰吾知法耳陳其罪狀論棄市諸黨附者以次具獄上內惜勛而難於法持其奏不下勛竟瘐死獄中會秋當報囚上怒責山論讞後期禡爲民山卽日就道行至彭城發暴疾卒於利國

## 吳江縣志

### 卷二十七 名臣

十七

監驛年七十三山倜儻魁梧聲如臣鐘性孝友與諸弟析居自取敝廬朽物而已與人語洞見底裏不設城府歲饑嘗折逋券萬石以爲賑鄉人德之隆慶初子邦楨請於朝復原官贈太子少保明興父子尙書者十七家吳氏兩世司寇俱以明允稱山後列祀府學鄉賢祠子邦棐字子彝少負氣節嘉靖時歲大禋道殢相望邦棐出粟賑之疫作又作藥餌里人全活無算中年無子買一妾妾父以金償官賦及期促女治裝女有難色邦棐卽止不娶亦不責還金族有子女之無依者悉

收撫婚嫁之卒年五十八

參獻集

吳巖字瞻之山弟正德三年由進士爲行人六年擢工科給事中遼東屬國詣闕下訴其使者被殺巖奉詔馳至遼廉其實還言邊吏貪首功不治將生邊釁遂抵邊吏罪諸部悅服九年乾清宮災詔求直言巖以視朝講學建儲及斥養子番僧罷邊兵中市諸事皆已所欲言而羣臣先言之遂條解之以上語益切至時稱其虛已善諫十二年遷刑科右給事中未幾陞左明年遣部使者督民逋負并及已

蠲除者巖疏請召還又乞遣大臣治東南水利開濬吳淞白茆之淤塞引太湖水注之海上皆從其言十五年擢掌工科明年遷四川參政尋奉表入賀道卒

參獻集沈

漢撰墓誌

顧昂字仲光正德十二年進士授將樂知縣縣雜戎伍獷悍難治昂至申明約束皆畏戴之人爲刑部主事時方議大禮昂上疏不肯附張璉桂萼坐奪俸乃以母

老請改南京遷汝甯知府

按部屬必應郎中而後外轉銓法也此節當有脫文

汝甯多宗藩大姓俗好忮刻

昂鎮以清靜政化大行後引疾歸先是昂去將樂士民思之久而不忘乃立碑縣庭以表其德至今縣有顧公祠焉嘗作忠孝經傳注藏於家孫大綱事母以孝聞

爲詩有雅裁

見獻集

沈漢字宗海父奎見孝友傳漢家貧力學爲人倜儻有志略正德十五年中進士值武宗南巡明年世宗立始第起家刑科給事中時言路方開漢性亢直奮然以諫爭爲已任中官馬俊王堂被罪久廢忽自南京召至將復用漢上疏罷之又疏

## 吳江縣志

### 卷二十七

名臣

十八

奏改元詔書蠲四方逋稅恐負官錢者多姦猾不可例免請敕戶部差別上年輸納多少之數定今年蠲免之等以惠良民如歲入不足則近日籍沒姦黨資數千萬可悉發太倉以補之又言草場芻豆歲巨萬多爲中人乾沒初詔科道稽覈乃誤聽太監閔洪等言復罷去是先朝之弊政方革之而旋啓之弊將安極請仍行前詔并敕送閔洪等法司正其抗奏之罪又京師地震援漢五行志上疏指斥時政反覆千言上皆納之

按唐樞序漢諫疏謂以上四疏悉見納舊傳頗踈

嘗書漢名於屏上尙書林俊去

位復抗章爭之戶部郎中牟泰坐吏盜官帑下詔獄貶官漢言吏爲姦利在泰未任前事敗而泰發之無罪因極言刑獄宜付法司母委鎮撫不納嘉靖二年以疾告歸五年補原官轉右給事中六年遷戶科左給事中初張孚敬與漢同年大禮之議意漢必附已漢三疏固爭孚敬與其黨皆御之及武定侯郭勛營庇妖賊李福達死罪蒙宥漢上言高皇帝欽定律法姦黨與叛逆同誅今郭勛交通逆賊受賂請託賣國大姦請敕送法司勘問依律定罪會孚敬等奉命署法司鞠福達事

勛求援於孚敬等竟出福達罪而罪前問官遂以漢扶同妄奏并逮訊予杖下詔獄削籍爲民後勛坐事逮獄尙書毛伯溫欲薦起漢漢上伯溫書力辭乃止家居二十年而卒年六十八隆慶三年復漢原官仍贈太常寺少卿

此據穆宗實錄舊傳謂嘉靖中赦復

原官 有諫疏十二篇行世

參明史其明史與舊志闕誤處以明世宗實錄及原疏彙等補正

按明倫大典漢於大禮之議有三疏正德十六年爭皇號嘉靖二年爭安陸樂舞五年爭觀德殿雖皆與同官連署名然亦漢之大節也故世宗實錄載其爭觀德殿疏而明史舊彙亦載其爭皇號疏云

張銓字秉道越來溪人嘉靖元年舉於鄉選爲膠州知州其地濱海磽陁俗勁悍屬歲飢流庸轉徙羣不逞剽劫爲亂銓擒首惡數人置之法餘悉解散因言於朝蠲常賦之半民用安集尤篤意教化修學宮選諸生俊茂者親爲講說經義貧者衣食之有古循吏風遷南安府同知嘗攝府事又攝南康信豐二縣上官知其能數使治煩劇若經理屯田更定權課諸所建白皆著爲令盜起隣境殺掠吏民銓

## 吳江縣志

### 卷二十七

名臣

十九

承檄討之獲其渠率餘皆望風降不戮一人後入覲道卒年五十二銓風格高整機鑿精明未仕時已通達世務嘗與郡守王儀議賦役法條刺十事言皆切至守雖不能盡用然內敬重焉及當官臨事智略輻輳每手削公牘頃刻數百千言雖老吏讀之無不驚服性孝友遭父喪哀毀踰禮撫庶弟有恩爲詩文雄壯激烈慨然有經世之志未究其用論者惜之著有尊江存彙一卷行於世

見獻集

王守字履約先世本章姓居同里父貞贅郡之王氏遂冒其姓守爲人端重有蘊藉嘉靖五年成進士授甯波府推官奏最擢刑科給事中尋轉戶科左給事進吏科都給事疏陳六事上取次行之而守退焚其彙人莫能窺其畛域時張孚敬當國臺諫多與齟齬守獨能得其意衆亦不以爲嫌也遷太常少卿遣視延綏寇患劾中官及握兵重臣皆被譴責一時在邊者莫不悚然轉大理少卿又轉南光祿卿尋進右僉都御史巡撫鄖陽改督南京糧儲又改理河道進右副都御史召還守歷任數大官事皆無可見而寬簡清靜未嘗有所變更卒亦無不治人謂其令

望足以鎮之後二年卒於官守議論無所假借非其人交鄉人有自微劣得清華者靳不與一刺所交惟湯珍祝允明唐寅文徵明輩詩宗盛唐五言律不減王孟風格有集若干卷

本獻集參府志同里先哲志

趙禴字敬孚寬子嘉靖中以貢入太學知廣西岑溪縣進韶州通判在韶三年有惠政會巡按行部至韶兵備道王某從海兵繼至越日英州失庫金捕海兵繫獄巡按檄禴訊鞫禴以實報王怒其訐已覆坐守城兵連逮無辜二百餘人禴執論再三見知府鄭某而哭鄭知事不可回解印去巡撫聞親鞫之事乃白而禴卒以是免歸韶民感其德與知府鄭竝立生祠祀之

參韶州去思碑記

葉可成字懋學嘉靖三十二年進士知山陰縣有廉直聲胡宗憲開府辦倭知可成才留之幕府令參謀畫凡兵食調度攻守形勢皆從中贊決動中機宜吾邑盛墩之捷敵樓之築可成有力焉

按吾邑盛墩之捷在嘉靖三十四年時主兵者為總督張經巡撫則李天寵而宗憲則為巡按宗憲

與趙文華比而攘經之功効去經與天寵而宗憲乃進巡撫又進總督可成以宗憲開府在幕則盛墩之捷疑無與焉或宗憲為巡按時可成已佐之則不得第云

## 吳江縣志

### 卷二十七 名臣

一二十

宗憲開府辦倭可成留其幕府也二者必有一誤

宗憲性剛有所失軍吏莫敢爭可成善為調護多所補

救嘗有裨將四人失律當斬可成請赦其死責後效卒皆立奇功云以薦擢南京工部主事謫蒲州同知有嫠婦私於僧誣其子以逆可成佯坐子死令婦具棺及伺具棺者僧也遂納僧於棺生埋之而釋其子人咸快之尋免歸卒

見獻集

時有計

江者喜談兵好奇計與會稽徐渭四明沈明臣友善歸安茅坤亟稱之宗憲辦倭時江亦在幕與有謀畫功宗憲薦之朝江謝不受徵時論高之

顧曾唯字一貫同里人嘉靖三十二年進士授金華知縣縣故倚郭里甲困於供億曾唯悉裁冗費均徭役民甚安之明於聽斷庭無留獄有商人販芝麻募市傭擔入主家途次逸三之一商訴之縣曾唯麾商出越數日喚集羣傭將他委傭悉入令西立以次呼名趨而東輒取所負筐囊倒撲之見芝麻糝糝下一訊具服捐俸鬻地以廣學宮三十六年擢監察御史巡按廣西嶺外屬吏多以賄彰至悉廉治之宗室有犯法者抗章劾之自是豪右屏跡湖廣歲供廣西餉多後期輒以洞

庭風波爲解曾唯奏衡永諸郡接近廣西道路交通可以直達省轉運勞費遂爲定制初安南使者至常以稽覈領襲補易儀物或十餘年不遣曾唯上言遠人內附當以德懷其使俾得畢事而還不宜久留失信遐外上從之巡歷甫竣以大父年高請告歸嘉靖末吳中屢中倭毒又苦水災曾唯上禦倭策及賑荒議多見施行鄉人甚賴曾唯性孝友推故廬與族人共居父亡弟妹子女婚嫁咸躬任之持祖母喪俱盡禮未及禫而卒年四十九所著有西臺奏議易說及詩集數十卷從弟曾貫字一之深於易著易經了義便讀教授生徒遠近宗之

參獻集文徵

周大章字章之

獻集云字一夔

沈雄慷慨具文武大略嘉靖三十一年舉人明年下第歸

值倭夷入寇轉略近地大章乃糾合義勇教練之部署指揮儼然一老將也以平望夾浦爲南北要害地乃進議於知縣楊芷設兵駐守日治戈船寇至或飛艦截其上流或輕舟邀擊親冒矢石戰湖蕩中勝於青陽港錢田石湖唐家湖鶯脰湖太湖諸處終始五年斬馘過當總制胡宗憲上其功次於朝當授官大章以養親

## 吳江縣志

### 卷二十七

名臣

二十一

辭上曰孝既可嘉忠亦難泯乃官其子崇仁蘇州衛副千戶子孫世襲後太章署浙江餘姚教諭隆慶初補瑞安知縣縣濱海先被倭患至是復旱荒大章力請兩臺免徵加派織造銀民甚德焉以瑞安地臨險阻而城庫陋乃鳩衆築城九里門皆有樓周以雉堞復建議海安瑞安沙園三所合操躬臨訓練全郡倚之竟卒於官年六十有三大章工古文詞才筆雄健在瑞安有上巡撫趙某便宜劄子正大剴切所著有文藝集禦倭武略行於時弟大韶太學生亦明於兵法尤精水利參宗憲幕府倭寇從杭州乘勝連艘而下浙直督撫咸集平望一欲驅之北一欲驅之南議未決大韶曰天下一家奚分南北當會兵鷺湖一戰殲之耳諸公壯其言一戰大捷萬曆五年巡按御史林應訓議開東南水利引大韶事首疏長橋兩灘以通十郡咽喉繼治白茅吳淞七浦諸塘以洩太湖下流淤者去之淺者濬之而於田間隄岸尤極修舉十年秋颶風淫雨湖海相連不數日水患卽平不爲災大韶又條上浚河之策於當事略曰東南水利源者太湖委者三江諸浦瀦者湖

泖洩者溝港河渠海能受水爲百谷之王修治之大綱昔人云在開河在築圍在置閘在今日則築圍爲先開河次之置閘又次之然常鎮爲上流不疏則無以清其源蘇松爲下流不治則無以導其歸故必增二壩復五堰使西北之水入於江浚三江通諸浦使東南之水入於海時不能盡用今所傳者有水利節略兵家緒

言凡數十卷

參獻集  
文徵

潘志伊字伯衡嘉靖四十四年進士授定州知州州號衝疲丁糧外舊有門銀千兩志伊曰有田則有租有身則有庸安用門銀爲遂罷之達軍數千自成祖時內徙設都司領之桀驁難制志伊曰華夷均赤子軍躡吾民治勿貸民有詬鬪者亦繩以法境內大安轉南京刑部郎中以憂去萬曆二年起爲刑部郎中先是有指揮周世臣者故慶雲侯壽之裔孫也居東城小巷家止一婢曰荷花世臣夜爲盜所殺巡捕張國維坐事住俸乃執其奴王奎誣以與荷花姦謀殺世臣下法司訊志伊曰疑獄也姑緩之會左侍郎翁大立署部事國維以獄未成俸不得復陰結

吳江縣志

卷二十七

名臣

一十二

大立左右爲言司官受賄留獄大立信之促具獄志伊持不可強之乃請移他司會勘而他司郎中徐一忠等承指擬奎等俱辟是秋當決志伊力爭得止四年冬恤刑由東遂不得預部議而奎等竟決矣尋出知九江府而京師獲大盜朱國臣等自言殺世臣者我也奎等固無與於是給事中周良寅等劾大立失人之罪坐削職而志伊請移他司有規避之情亦降補陳州知州歲大侵發廩賑救出所節省丁糧千金全活甚衆十一年稍遷知南康府宋白鹿洞書院先爲當事所毀學田三十餘頃悉廢志伊力復之又五年遷按察副使袁州兵備會歲旱米貴民采蕨食志伊預計倉庫之羨酌被災輕重差次給之民始獲甦十九年遷陝西行太僕寺卿甘肅馬政久弛志伊親閱馬高下定值盈縮綜覈有法人不敢欺二年改廣西參政初志伊在陳州州人好盜有諸生掠其族孤寡志伊以白督學孫丕揚丕揚怒釋諸生不問而內隳之至是爲吏部尚書竟以考察論罷猶坐王奎舊事云志伊所著有山東問刑條議不遇紀事諸書子錫祚字永甫以蔭生爲撫甯衛

經歷遷湖廣布政司理問卒於官好古博識在撫甯著南陽問答策遼事如指掌

焉見獻集 按明史志伊附翁 大立傳中云志伊歷官有聲

陳王道字孟甫為諸生二十年讀二十一史凡三過嘉靖四十四年成進士授鄞縣知縣縣豪右倚勢作姦者必捕治置之法以內艱歸補山東陽信故事九則算賦以上則供保馬而陽信列上則民殊不堪巡撫檄王道覈其平遂定陽信為中下則著為令擢南監察御史有直聲南都貢院號房向蔽以席每試值風雨如露處王道疏請易以瓦至今士子賴之王道治鄞以嚴治陽信以寬竝以才能廉慎著其卒也鄞陽信皆祀之名宦祠參王穉登撰傳

卷之二十八

人物五

名臣三

沈璟子自鉞

李周策

王有功

陳良模

毛壽南子以燿

沈瓚

吳江縣志

卷二十八 名臣

一二十三

袁黃子儼

吳昌期

沈琦

沈琬

周道登

趙士諤

沈珣子自友孫永禔

沈璟字伯英漢曾孫數歲穎悟有神童稱萬曆二年成進士時年二十二授兵部職方司主事以病免尋補禮部儀制司進員外郎改吏部稽勲司歷驗封考功二司以父喪歸復補驗封十四年左遷行人司司正十六年為順天同考官遷光祿寺寺丞以疾乞歸歸二十餘年卒年五十八其在兵禮吏三部時邊徼阨塞及各將領主名皆有手記入夾袋中親較宗藩名封諸籍不入吏手詢訪人才不令人知後復補驗封司會神宗生第三子諭封其母鄭貴妃為皇貴妃時少師申時行等請冊立皇長子為皇太子戶科給事中姜應麟請收回封鄭貴妃成命皆不聽璟乃復上言請定大本詳大典以固國脉并請皇長子母王恭妃封號按明史但載請王恭妃封號略也上怒疑璟賣直故左遷行人司司正為順天同考官所得士有李鴻為時行壻言者以為私璟不